

□ ابوشنطة! □

— قدمت مظلمة للباشا مدير السجون ، لكن ما حدث سأل فيه.

— ليه ؟

— أبخات بقى يا بيه .. وبعدين بقى .. ربنا ينتقم م الظالم .

ولزم المعلم طقطق الصمت ، وراح ينكش فى أسنانه بعود نجيل  
أخضر أنتزعه من أرضية حديقة السجن .. وقطعت عليه صمته قائلًا:

— ومين اللي ظلمك يا معلم ؟

وكانما لسعته بجمرة نار ، فانتفض صارخا .

— و النبي يا أستاذ ما تقلب علىّ المواجه .. ربنا يسترک .

— فيه حاجة إنت مخبيها عنى يا معلم .. إيه هيه ؟

— ربنا يخليك تسكت .. أنا مش ناقص .

— وخايف من إيه يا معلم طقطق ؟ هيجراك إيه أكثر م اللي جراك

— ممكن يجرالى حاجات كتير قوى ، أنت باين على نياتك .

دار هذا الحوار بينى وبين المعلم طقطق ذات نهار فى حوش  
السجن، وكان الجو شتاء وفى عام ١٩٧٣ . وعندما جاء الصيف  
واقترب موعد الافراج عن العبد لله . جمعتنى مستشفى السجن  
بالمعلم طقطق . وذات مساء انتابته نوبة كحة شديدة كادت تقطع  
شعيرات صدره . واعتقد أنه كان يبصق دما عقب كل نوبة سعال  
شديدة ، واستدعيت له طبيب السجن الذى أعطاه مهدئا ، ويبدو أنه  
أعطاه جرعة منومة أيضا ، وسألنى المعلم طقطق فجأة :

— أنت خارج امتى ؟

— بعد أسبوع إن شاء الله .

مال برأسه ناحيتى وقال .

— أنا كنت عاوز أقولك حاجة .

— أتفضل .

— عارف الراجل بتاع الشنطة إياها ؟

ماله